

摘藻堂四庫全書薈要

集部

欽定四庫全書薈要

集部

圭齋文集卷八

五至



詳校官助教臣謝登雋

欽定四庫全書薈要卷一萬六千四百七十八


集部

圭齋文集卷五

元 歐陽玄 撰

記

道州路重修濂溪書院記

道州路濂溪書院是為子周子專祠其址在郡城西偏與郡學為隣郡學有先聖廟每歲春秋二仲上丁郡侯率教授山長各以其職事命生徒祀先聖於郡學次丁則合祀子周子於書院之專祠每月朔望款謁皆然原

其初建雖由時君有獨祠濂溪之命亦其地勢適然故祠事之專無間言者焉歲久祠宇寢壞至正壬午山長張某議撤而新之郡士李某樂助以相其志工未訖去代者歐誠能繼其事於是祠宇一新歲乙酉番陽吳侯肯來為郡判官仰瞻新祠而門廡弗稱謀諸郡長復加繕修適山長戴世榮又來代歐而郡士蔣通復請出資改作應門四楹兩櫺稱是祠之後舊為誠源堂堂之後為故守高峰楊公之祠左有愛蓮亭及清遠樓後有光

風霽月之堂至是斥故易新丹雘輝映世榮割已俸作  
石臺於應門之南縱廣二丈橫倍之又率郡士文某作  
瞻德亭亭下甃石為街繩直砥平中外改觀前此未嘗  
有也先是周子有子二人長司封郎中壽次直徽猷閣  
燾燾之後遷居江州燾之後居道州吳侯求得其八世  
孫善溥薦之當道請援顏孟例世以其後人之賢者為  
書院山長以奉專祠憲府是其議移有司達之行省焉  
明年丙戌冬吳以漕事至瀏偕世榮奉事狀謁于歐陽

玄請記以文玄惟周子祠事若舂陵若九江豫章邵陽  
諸郡皆有碑刻作者多世大儒玄於是記叙勞績紀歲  
月斯可已矣然而紬繹父師之言亦有可贊一辭者不  
敢以勦說辭也昔者子貢曰夫子之文章可得而聞也  
其言性與天道不可得而聞也孔子言性與天道莫著  
於易所謂乾道變化各正性命所謂一陰一陽之謂道  
繼之者善也成之者性也皆言性與天道當時門人可  
以與於斯言者鮮其人焉子貢晚年始獲有聞故以歎

美之及孔子沒知此者子思孟子西漢以下諸儒見其  
髣髴焉子周子生乎千有餘載之下得孔孟之緒言著  
太極圖通書泄造化之蘊發聖賢之祕如指諸掌故孔  
孟之後首言性與天道者周子一人焉世儒或疑周程  
授受不及圖書殊不考程子之言有曰天地儲精得五  
行之秀者為人其本也真而靜其未發也五性具焉曰  
仁義禮智信形既生矣外物觸其形而動於中矣其中  
動而七情出焉曰喜怒哀懼愛惡欲謂斯言不出於太

極圖說通書可乎孟子言天地之性程子兼言氣質之性然後荀揚韓子之說俱廢氣質之論原於周子灼然無疑者也且自太極圖說通書行世世之為儒者苟知讀濂溪之書無不獲聞性與天道之言焉假令子貢復生當歎今之學者得聞斯言為幸而諸儒有橫議於當時者果二書之為異乎抑立論者之好異歟皇元定宋九儒從祀周子居其首尋又有制進汝南伯為道國公蓋乾淳以來新安朱子最先尊信其書聖朝重朱子之



學以程式天下之士則周子之書益表章於世宜哉雖然國家興學之地可謂至矣周子曰師道立則善人多善人多則朝廷正而天下治矣繼自今教者以師道自樹學者以善人自期將見真儒之効施於朝廷四方未有紀極如是則書院之修豈徒侈專祠示觀美而已玄幼年侍先君子職教是邦讀書濂塾之側追憶往時來游來歌之地因吳侯之請輒以舊所聞於家庭者附著於斯焉吳侯肯字肯堂以教官入流選為憲掾進行省

掾歷南海武昌兩縣尹皆以善最為政廉明且知大體  
云是役也達魯噶齊塔海大中同知某實綱維之其始  
終協恭則經歷李時知事李信也

貞文書院記

昔在仁宗皇帝之世集賢大學士陳顥翰林學士承旨  
和塔拉都哩默色等言翰林揭傒斯之父來成學行師  
表一方宜特賜謚以示聖朝尚德之意於是有旨賜其  
謚曰貞文先生至正三年夏四月中書平章政事特穆

爾達實右丞太平賀等又請於今上皇帝建立書院遂以貞文之號賜為額其址在富州之長寧鄉舊山之陽前挹遙岫後倚崇岡平疇曲谿映帶林麓蓋揭氏先世故居之地也其制為大成殿四楹於中殿之北為明倫堂四楹殿之南為門四楹上為重屋門之南為櫺星門四楹別為貞文祠置明倫堂之後左為山長之署四楹其兩廡為諸生齋居左右皆四楹齋之南又為屋各五楹庾庫庖湍咸以次置其上始於至正三年之九月訖

於九年之七月其後從子範經始之而元貞寺僧智辨相之山長湯盤繼成之其山長則行省以儒士之嘗歷學官為之其門之東屋則從孫德懋萃舊岡書院之材所建也其櫺星門則僧智辨之所立也其祭祀教育經久之貲則里人之好義者割上腴田以相其事書院垂成文安公與玄以同在史館一日詣玄以記書院為請玄敬諾之喜而歸以語其子泂曰今日吾書院事畢矣歐陽君已諾吾記矣越數日文安疾作又數日卒三年

泮申是請玄乃記之又告其徒曰古之學校為教事設而政事出焉辟雍泮宮習射養老出師受成皆在其地何莫非政事也後世學校雖治教事而特以祀事重焉攷其所始古之入學者舍菜先師未嘗專有所指而舍菜之禮亦祭之至簡者也今州縣學校則必專祠先聖先師於是國家秩諸祀典若夫書院則又多為先賢之祠或其過化之邦或其講道之地如是者不一也亦嘗攷其所始焉周禮大司樂有道有德者使教焉死則以

為樂祖祭於瞽宗瞽宗者學之名也古者教之以德為  
先涵養德性莫先於樂故有道德而為師者其生也以  
教人其死也人推本其教以樂祖祀之非必洙泗而下  
若漢董子若隋唐王通韓愈氏若宋周程張朱數君子  
之為先儒而後為可也矧夫書院興學校之制其始又  
自不同東漢以來大夫士往往作精舍於郊外晉魏所  
謂春夏讀書秋冬射獵者即其所也唐宋之世或因朝  
廷賜名士之書或以故家積善之多學者就其書之所

在而讀之因號為書院及有司設官以治之其制遂眡  
學校故祀事有不容闕者於是或求名世之君子以祠  
焉玄嘗循流而溯源蓋自入學舍萊先師一變而為通  
祀自學有樂祖之祭一變而為先賢之祠自春誦夏弦  
一變而為呻呶再變而為詞章又且黨庠術序一變而  
為精舍再變而為書院學者苟不能知建學之初意又  
豈能知為學之大功學校所重在祀事而宮室象設之  
制日趨為觀美所任在教事而禮樂律厯之學或諉諸

專門遑議所謂政事之行於學校者哉皇元起軼百王  
務以崇雅黜浮為教以去華就實為學復古之機其在  
於是貞文先生以道德教一鄉之人死而祠於其鄉稽  
諸樂祖瞽宗之祭真無愧乎古人者也玄故著其所始  
願以求正於好古博雅之君子焉至於揭氏父子以稽  
古之功修身之效被遇兩朝垂耀百世可謂儒者之至  
榮猶有待乎論述也夫貞文先生諱來成字哲夫以子  
貴累贈通奉大夫江西等處行中書省叅知政事護軍



先謚貞文國朝處士易名之典自公始文安公諱侯斯  
字曼碩卒官翰林侍講學士中奉大夫知制誥同修國  
史贈護軍謚文安父子竝爵豫章郡公二公懿行偉節  
各有列諸別碑云

袁州路繕修記

宜春為郡介江湖間山水清隲風氣厚密其神能靈其  
民能淳為厥長吏因俗易使導以身教利建事功至順  
二年冬十二月通議大夫濟勒布哈擢由容臺來刺名

郡私未黔突畢飭在公乃睇府治東拄西撐徂厥門廡  
上漏傍穿部使之館賓幕之次以及燕休之堂登眺之  
樓游息之囿觴詠之亭府史胥徒脆闇廢廡舊有位置  
今穢不治或傾欲隳或危欲壓維時錦侯乃諏寮案乃  
咨賓屬宿戒父老斯徵富民進而爵之侯乃言曰治宮  
猶家家之隆替觀所恒居垣墉虧䟽廡陞夷削凡百廢  
隆推是知之視彼富潤有覺斯楹勢固不侔亦所自致  
矧今牧守視古侯伯維今富民其道視予其分視臣爾

退而處服御華好側睨長上居懷貼危從我遑卹寧汝  
獨安吾嘗觀風考察部屬有司興繕弊有二焉民賦力  
產吏容奸欺官督期程工售濫惡苟完未幾馴致朽撓  
粵有文吏拘牽故常事在得已輒持兩端媮容目前遺  
患厥後迄夫淪胥滋以病衆斯二弊者吾實恥之今及  
汝約恒產高下推次惟女工稍多寡陳力惟汝官不督  
迫吏無徵呼汝某治甲汝某治乙我惟示成有不樂者  
疇抑汝配於是父老曰便富民曰宜言訖飲酒罷而與

期及期子來竝手角能植者用壯承者用隆冪者無窳  
慢者無壚械者砥平磨而覽之丹者黜者藻者繪者無  
或漫漶後先工訖完美如一突突從衡楹數百計悉前  
所陳煥若新作侯乃練日共具牢醴合樂落之又進父  
老及諸富民爵如初儀為之言曰維此宜春郡治奕奕  
山川發靈神降純嘏暘雨時若有年穰穰民富以教士  
秀而文吾幸處此與爾同休去即傳舍凡厥洵美汝世  
享之守何與茲父老富民咸下其手合辭報公且矢於

福願錫蕃祉與治俱新天子萬壽百度斯甄公敏且潔  
宜為蓋臣居匪奉已示我等倫我民於變不戒以信受  
命工上服勞其親筮占在茲施我子孫無遺公憂以愧  
我民參軍楊撫奉圖走書來求予文予核其事辭以繹  
之且告來者嗣而續之有廢不理衆手撤之撫從予遊  
為我石之是役初作郡牧之長已延特穆爾相與飲之用  
迄于成是皆宜書尉韋元輔實董其事吏宋必達又宣  
力焉侯至之明年壬申九月僦工又明年癸酉七月竣

事記以是年之八月土木金石埏埴礱斲工費若干俱集衆力不會於公無從稽云

安成李氏重修安賢義塾記

安成李君辛翁初作安賢義塾於州西郊一倣書院精舍之制禮殿廡門講堂齋舍各有其所未幾即世規模有未備者子剛慨然念先世美績無加於此乃割上腴田若干定為教養恒式出納恒度凡可以經久而不廢者一一講求而完美之於是塾師劉君權具事實謁予

記之予嘉李氏有子之能繼承也又感義塾之作是蓋  
君子至公之心而古道可復之機也為之記曰昔者先  
王為井田以養民為鄉校以教民周衰井田法壞斯民  
貧富至於相懸鄉校法壞斯民賢愚至於相絕而君子  
小人之事判然兩途賤日益多貴日益少法日益密禮  
日益踈後世興者雖汲汲然設為教官之任而井田經  
界勢不可復郡邑教養豈能徧及齊民也哉有富而好  
禮之士出而建義塾焉義塾既作一鄉之士患不志於

學不患無從師之資一塾之師患學者之不勤不患供億之不繼推此至公之心求復世道之古其機不在茲心乎師道由是而立善人由是而多風俗由是而美義不可勝用矣禮門左之堂曰塾塾之為言熟也吾固願義熟師友之至斯也教者熟於其教毋致扞格而無序學者熟於其業毋致寒暴之罔功如是則無負李氏建塾之美意矣李氏安成大族宋末累以著述獻於朝其貢名天府者接武辛翁號一峯剛字立中世以文行稱



於州里云

趙忠簡公祠堂記

臨川王安石以新學誤宋致天下騷然河南程氏兩夫子出而救之卒不勝其說既而蔡京為相宗王氏說黜程氏學宋遂大壞京客張鬻教京亟召程氏門人楊中立用之庶幾救其半及宋中興解人趙忠簡公鼎為相首罷王安石孔廟配享尊尚二程子書凡其門人之僅存者悉見召用江左乃復振不幸秦檜相忠簡公斥程

氏門人散亡洎中興業衰又不幸韓侂胄相禁建安朱文公熹之徒之為程氏學者其後禁稍弛宋已日削皇元熾興江漢趙氏復能倍誦程朱書北渡江私筆以授學者許文正公衡衡神明其書進以所得相世祖興禮樂文太平後是四十年貢舉法行非程朱學不試於有司於是天下學術凜然一趨於正時相尋定濂洛以下九儒及衡十人祀孔子廟庭天子從之至順二年春趙忠簡公六世孫箕翁請即解之聞喜縣學為忠簡祠其

辭曰公當宋南渡排王氏邪說崇程子正學以至於今  
有功於斯世甚大宜祠其鄉胄監集賢是其議中書禮  
部告晉寧路以符屬其同年歐陽玄記之玄平居讀孟  
子至承三聖一章未嘗不掩卷汗下以為何致是烈也  
及略考近世儒學之邪正有關於國家之隆替氣化之  
盛衰民物之榮悴其可徵者蓋如是嗚呼是祠豈細故  
哉公師邵伯溫友胡寅其問學原委措諸行事詳見宋  
史竇翁延祐二年進士卓然有志先正亦可概見於斯

保靚祠堂記

保靚祠堂者安成劉君尚節祠其七世祖考保靚先生者也先生諱作字賢礪保靚其號居袁吉間地曰秀源在宋乾淳一時聲光煥然起於郡邑初用世賞授將仕郎辟贛之安遠尉母老不赴中歲韞德抱才不屑世用友當時搢紳清江兩尚書謝公昌國章公茂獻廬陵楊文節公廷秀皆定交筆硯骨鯁如胡忠簡公邦衡亦深見結納其他名賢不可悉數百餘年以來世代變遷遺

韻日遠諸孫尚節幼負志氣讀其遺書慨然慕其生平  
懼其親盡既久後人無所瞻仰謀即故居建祠堂以致  
專祀而諸賢翰墨存諸碑版者亦復散逸尋得忠簡公  
保靚記跋及謝公諸書又漁父來告某潭有石狀如碑  
以手切之有字尚節使沒者群入助漁舉石出果左宣  
郎劉君廷直所為保靚祠堂銘也他日營父塋於白石  
岡掘地三尺得碑卹勿音寧讀之又永州通判董德  
中所為保靚先生祠記也於是尚節益喜繕祠益勤至

元後庚辰春祠成置龕奉保靚主列碑其前議割上腴田若干以給常祀擇日率族屬子姓祭以告成竣事而飲族屬舉杯勞尚節曰保靚往矣非君之賢祠事曷興造物者出二碑以相君志也余至黔南族中族與劉氏世為婚姻尚節謁予文為記予惟瞽宗祠於學鄉先生祠於社尊有道尚有德也此禮廢已久保靚祠堂雖成於其後人異時郡國因餼羊以復告朔古道其庶幾乎乃為迎送神詩遺劉氏子孫使歌以祀先生詞曰

古之檜兮袁之裔介兩郡兮大容礪昔賢居此兮物無  
厲物無厲兮民有歲道之耕兮德之刈刈德兮耕道深  
資兮靚保保靚兮何為山有碣兮水有碑碑無沈兮碣  
無瘞曾孫有祠兮傳千世世幅巾兮深衣先生來歸  
兮無我違違我兮焉往從諸賢兮詠歸尊有冽兮俎有  
肥芳菲兮闔兩扉石韞玉兮山有輝微先生兮後人疇  
依

安先生祠堂記

所貴乎處士者能以一己之所守為一國之所慕雖當  
世英君誼辟操其摠攬豪傑包舉宇內之柄一旦遇夫  
爵祿慶賞所不可致之人於是怡然企乎先王道德之  
懿真有貴於己之所負挾者而後上之趣向定下之習  
俗成斯人者功下韓孟哉元有國以來學者言處士必  
宗容城劉靜脩先生方是時聞其風而起者曰真定安  
氏敬仲焉敬仲未嘗一造劉也顧得其傳於濂洛考亭  
者知之為甚篤行之為甚堅由是推宗以合於祖一也



劉氏高亢明爽梯級峻絕士親炙者寡安氏簡靚和靜  
襟韻敞夷士樂附者衆異時有祠宜乎抑自先民石峯  
恕齋兩先生以學淑其鄉蓋三世百餘年於茲矣此又  
祠之所由作歟敬仲既歿門人蘇君伯脩貽書同舍橐  
城西管鎮李君士興請祠為鄉先生士興議克合乃築  
於鎮作三室而奉之自敬仲上而至於石峰恕齋咸有  
位焉明世美也落成率里塾子舍萌歲時具蠲所事至  
是伯脩請予記之然予記安氏祠而本以容城者亦猶

論東漢名節而始嚴光乎漢至孔張末之儒也矣微光  
東都士何自作新哉光未必知道也而且如彼而況吾  
濂洛考亭乎而況吾容城乎夫瞽宗祠於學鄉先生祠  
於社古典也瞽宗久無聞鄉先生有祭自伯脩士興始  
以是知古道無難復人患不為爾繼自今西管鎮之俗  
日益以厚其民敬學而賤利其士樂學而遠勢安氏之  
澤其有既乎讀是文者尚知所始石峰諱滔恕齋諱松  
敬仲諱熙出處詳見家集云

秀川羅氏祠堂記

先尚書公遊鄉校時善校官羅子遠子遠廬陵秀川世族篤學力行有詩文傳於世後為朝請大夫主權貨務言賈丞相專權誤國棄官去子家藏其遺墨思欲見其子孫今其族孫仁達過予為人英敏有為為文雄暢有氣予於是喜先友文獻之有傳焉仁達徵予記其秀川祠堂其言曰吾祖大時府君著籍秀川四傳至南塘府君家日以大府君之子若孫始割烏石陂腴田若干畝

為祀田時宋嘉祐二年也其後乃貢於舍貢於鄉登第於禮部凡百數十人於是蓬山先生溪園先生與其子蒼崖公礪谷公推廣祀田遺意追遠則有拜墓有合祭合族則有族譜有聚拜迄今三百餘年祀田世守如初族雖散居昭穆秩然必不可亂邈在萬里相見相問外有骨肉愛不相視如途人是皆吾祖貽謀之德與前聞人善述之功也惟祠堂未立合祭聚拜無定所議者咸病焉按家禮祠堂在正寢之東貞之居廳事之東有堂

曰遜繇凡十有八楹其深二丈有奇其袤稱之堂之前  
有軒軒之外有亭高明深靚宜祠乃請掌記務本翁以  
為祠堂祠大時府君而下八世至十二世各圖分派之  
祖止其有行誼有文學有爵位者特祠焉於是禹圭與  
翁之子繩祖第一圖孫瑛第十圖孫蘭復買田為灑掃  
修治薰燎之費自是合祭於斯聚拜於斯與祠田相為  
永久以卒前人之志先生幸一言以詔來者予既嘉仁  
達之能世其學又嘉其宗之能念其祖竊喜載名姓其

間自附通家之後有榮耀焉乃諗於衆曰惟大姓其祖  
必有隱德非德無以蕃無以著無以久久則我後人念  
之宜也念之念之奉其烝嘗云乎哉行其揖讓云乎哉  
思其人必繩其武食其德必篤其慶父詔其子兄詔其  
弟以詩書禮樂為教以孝弟忠信為行達則澤其民窮  
則善其身使國人稱願之曰幸哉有子孫若此祠堂之  
作為不虛矣詩云無念爾祖聿修厥德秀川子孫其勉  
之哉時予宗方作祠堂於故鄉以書來告成秀川去予

故鄉百里而近而祠堂之成適相先後於是喜德之不孤也乃以斯言為吾氏告亦以告之秀川焉是乃通家之道也

仰更齋記

臨川先生扁安成劉氏讀書之齋曰仰更劉君方升屬余客彭斯文來求予記初方升之大父號更齋先輩鐫君耘廬記之故臨川先生之命齋名也寓其大父之號焉夫仰更之義始於子貢之言嘗意其當時必有所謂

然日月之明未嘗息者也故人仰之於既更之後初不改於未食之前譬諸君子能存其心於衆人之正其或違而去之亦暫焉而已耳若夫本體之明則固未嘗息也余幼讀孟子至庶民去之君子存之等章見其歷序列聖所為憂勤惕厲之事至於孟氏自託孔子之意上下四章脈絡相屬而其卒章乃言君子小人之澤皆五世而盡初若甚無謂也已而思之蓋以明親有盡而理無窮耳夫日月之不息其明君子之不失其初斯固天



理之所以長存人心之所以不死者也。更齋之取號於  
更臨川之益之以仰其旨，不如是與？在禮有之。先祖有  
善，不知，不明，知而不傳，不仁，是責在吾方升矣。知乎此  
更之流風餘韻五世而已乎？劉氏自皆山翁友，吾宗巽  
齋先生一時如西礪、葉氏、槐城、錢氏及清江之蕭氏皆  
山皆善之。至方升克世，其學殖亦為臨川所期待云。

吳氏觀樂齋記

石橋介攸與天水間有二郡文獻焉。吳君明父之季曰

禮遜堂而藻播而嘉禾者也弱冠捧檄司直鳳臺予漫  
游至斯邀予至其家見其翁季唯諾伯仲埏篴信乎其  
名下無虛矣所居西偏因山以為讀書之齋謁予銘之  
將以號焉乃命之曰觀樂其事則竊延陵季子之於魯  
也其義則以明君子之立禮所樂乎成於樂也記曰禮  
者天理之序樂者天理之和然聖人之於禮必繼之以  
樂者蓋禮有所不達樂也禮有所不行樂也何謂所不  
達何謂所不行位也者人不厭高而禮辭高不辭卑財

也者人不厭多而禮讓多不讓寡渴也而禮掣之肘也  
不敢先長而爵也飢也而禮扼之咽也不敢先長而殮  
也如是則辭讓之不可長也勉強之不可久也迺為之  
樂焉融液其交際而辭讓出於欣然導宣其湮鬱而勉  
強至於安然矣昔者吳之公子其有見於此乎季子之  
遜有禮焉可以勉強言也而吾知季子之觀樂所謂樂  
其樂者也遜行於其家而風動乎列國之觀聽遜得於  
所性而膺合於先王之聲容其南也其雅也其韶也其

夏也是皆以雍容登降為樂而非以乖爭扞格為樂者也孟子曰樂之實樂斯二者仁義是也吾亦曰季子之於樂樂其禮也樂其遜也其樂斯二者之謂乎或者曰觀樂可也遜如季子未易言也余曰噫人能充無放飯流啜之心禮不可勝用也人能充無疾行先長之心遜不可勝用也而獨季子乎哉禮遜事親也恭從兄也順務學也敏遇人也溫是殆甘受和白受采苟觀樂也不亶遽於辟雍則喁弁於曲臺矣小之不得於美哉渢

淵之魏乎大之不有得於美哉泱泱之齊乎則余之名  
齋也而豈徒哉而豈徒哉高山仰止自余言始則幸甚  
遜齋記

有一言而可終身行之者乎聖門高弟固嘗有如是之  
問矣近代有行之者司馬君實之類是也蓋人之一身  
苟有得於一言而合於道則其生平精神心術凡見諸  
行事者莫不於此取則焉故雖一言也而可勝用哉君  
實之於實自為兒時至於相天下終始惟一言也然則

守約之道顧不至當歟吳君禮遜佳子弟也學殖之務  
尤孜孜焉嘗請於予曰吾於遜一字也深有慕而未能  
願仍遜以自號何如余曰旨哉言乎非所謂一言而可  
終身行之者乎夫遜也者吾黨之士入門第一義出門  
第一程也在禮入學鼓篋即以遜為先說命亦曰惟學  
遜志蓋吾之於道慊然如有所不知而後人告我以知  
退然如有所不能而後人告我以能謙以受道抑以從  
人茲非入門之第一義乎夫子曰義以為質而遜以出

之義之在人猶物之有幹也然辭焉而弗婉色焉而非  
愉則嚴而義者愈嚴有不可直遂者矣婉辭足以達意  
愉色足以致知茲非出門之第一程乎今吾禮遜學道  
則猶升堂而望入室者也涉世則積跬步而至千里者  
也是舍遜何所循而進何所齋而行哉雖然遜以出之  
又不可不信以成之也信以成之則如君實之守其實  
而後可也孟子曰孟施舍之守氣又不如曾子之守約  
吾於是亦云

譚氏肖山記

民生於三事之如一人言師有父道不知父亦有師道也父有師道則取之近而見之的信之確而慕之深故能用心專成効速也然則久之有賢父兄天下之樂孰如此哉余從攸士聞譚君古山之賢二十年蓋嘗周旋羣公先正間猶能衣被乾淳以來之風裁者也今年至是邦雖不及識古山幸有其子天球中剛外和言麗行則攸學無少長親疎咸謂余曰天球今之古山也故自



號肖山以著其志而天球亦出璜溪丁魁所書肖山二大字且言吾有丁字寶之有年君其為我發揮俾不至湮鬱幸甚余於是復於天球曰古之師其親者周公伯禽晉文襄師功業者也茂羅良辟疆師才智者也大史氏談遷劉氏歆向師文章者也然皆君子所務者也君子之所師惟其道相似而已昔者顏氏子之於夫子也步亦步趨亦趨亦於其道而已故夫子有視予猶父之言然孔顏非真父子也矧其真乎且道一也古山之

學學孔子者肖山之學亦學孔子者也苟能速肖其道  
焉豈獨肖其親而已哉儒者自孔氏言必稱聖賢不得  
以為僭古山諱用顏氏子字而字曰希聖豈非希顏而  
學孔子者乎故用是以相肖山之志

芳林記

宜春郭廷秀世儒家子也因其所居之地名著號曰芳  
林屬予族兄宜翁求予為之記予復之曰蘭生深林之  
中未嘗不自閔其芳也人以為有國香而服媚之蘭欲

自遠於當時其可得乎君子脩其身於暗室屋漏之地而聲流於四方萬里之外亦豈所願哉且夫芳林者君之所以自況也余雖乏一日之雅而樂為君記之良有以也夫殆猶蘭處於僻而芳播於遠也雖然蘭或握以事上或佩以修禊而其芳烈之氣不改於深林豈非其性然與草木無情能一其性人惟有情鮮不汨性君子存之蘭荃同畦不混於植蘭鮑同室不移於染斯以異乎衆人也吾聞廷秀之風清白之操使一日而進諸市

朝吾知其無愧於芳林也卓矣請以是為記

圭齋文集卷五

欽定四庫全書薈要卷一萬六千四百七十九

集部

圭齋文集卷六

元 歐陽玄 撰

記

分宜縣官題名記

分宜縣袁上邑置達嚕噶齊縣尹丞主簿尉各一員尹  
以上省選丞以下部選起至元十三年丙子迄今至正  
二年壬午六十又七載仕於斯者接踵而邑未有題名  
後儀趙君思順以世家文獻來宰斯邑二年官政修舉

乃考索故府得莅政名氏到罷歲月悉登載諸石玄適訪族邑鈴南防里屬題其端以告來者玄嘗謂題石之設官署皆有之本非以為勸善也而其道寓焉士歷官服采人品不齊上焉者不恒有下焉者無庸言中人苟且之政十居八九其志皆為三歲終更身去是即已殊不知身去而名留臧否何可泯也使能以是而存諸心則知官之為恫瘝也久矣雖然謂其身去而不之卹者非才而闇於事者也求為有名至於生事以厲民者有

才而過乎中者也。玄既為題名，有勸善之道，則不敢不著近名之弊，以為戒。趙君為我刻之後，之覽者有以自省，則吾鈴岡之人繼自今受廉勤之賜而被愷悌之福於無窮也。

分宜縣學復田記

昔前宋咸淳癸酉，分宜民曰宋應槐，訟其鄉有田稱梁子思所置立戶為萬壽菴，長明庄者，崇法院僧正冲之所作偽也。宋田令寺已有常住田，不得買民業冲違法

私買妄稱梁氏所置故應槐發之漕使鍾某閱實據法  
罪冲等而沒其田以畀分宜縣學養士士刻石為記其  
文載縣志甚明越三年宋亡分宜內附其田租歲入學  
廩前後凡二十有八載大德己亥庚子縣學直學鰲應  
丑死其子自昭受崇法寺僧錢盜以本學砧基簿買之  
由是僧恃力奪田學雖有文移在官求與僧論直而儒  
多寒酸學官滿三歲率去力莫能競僧挾其有餘之資  
又歲收所奪田租以助其力故訟連年不決延祐間江



西僉憲薩勒迪默色按問至邑攷覈始末以田歸學僧又  
爭之既而奉使宣撫及江西行省理直如前田復歸學  
僧德旻者往愬宣政院院達之都省省循例移行省體  
勘其是否行省檄下袁州路路以其事付錄事判官克  
呼決之克呼惟僧言是聽僧又誘刑餘之人冒儒名者  
曰宋應祥赴官誣伏怯烈輒以學田歸僧公議咸不直  
之學乃有詞展轉歲久本路專委縣尹趙侯思順研究  
尹詣田所集耆老佃人詢知固學田也會宋應槐子從

吾出前主學徐祺印信徵租之文以為左驗先是自昭

盜賣學籍於僧學無其副田之條段四至無所於考至  
是得從吾之文疆界瞭然尹乃周諏密訪備實上於路  
議以田歸學路質於憲僉憲巴延適按部力主其議憲  
掾某相之路推官鄭時中又屢言之尋得行省儒學提  
舉范君滙悉以其實告藩垣大臣咸直趙言遂以田歸  
學如初寺主大有坐是爭亦赦罷歸咎始謀赴官入準  
伏狀願遵分宜縣所斷以田復分宜縣學為業第數內

有水田四十畝及山園地大有舊所佃者乞減輕租額  
仍付耕種歲輸學租尹再三審之以其親書入案而徐  
議其所陳乞於是四十餘年之訟一日而絕諸儒礮石  
請文以記予乃太息而言曰天地間物人各得主其所  
有者以時王之法為可恃也在法可則物已物也在法  
不可則非已物也僧違法而田歸官則田非僧物矣官  
以田與學學受田於官非受田於僧也神聖受命易世  
凡前代之所予欲亦惟其是之從耳世祖皇帝在位崇

儒之詔累下其以膳學錢糧為養士之資者既久則分  
宜之學田實在其中矣成廟即阼又明有諸人毋得侵  
占學田之旨由是考之分宜縣學之主是田也在宋之  
日甚淺在皇元之日甚深由丙子內附至於庚子二十  
五年間田固學有也僧於斯時未嘗起而爭之也直至  
劉自昭盜賣砧基之後始生詭謀則其枉直較然易知  
也已國家近年田令民間田宅僧道不得為隣不為隣  
者不使買民產也後至元以來又著僧道買田之禁使

正冲私買在今日之法亦豈得為寺業乎嗟夫士四民之一僧亦自民出者也王官奉命以司王民之直於斯二者豈容心於其間哉事枉則必復事直則易斷趙侯之明能信其直故無疑也田在儒林鄉土名良步等處計一項二十三畝三分六釐歲入租七十三石二斗一升又有一山園地計五頃四十三畝一角亦在其處云是役也儒之宣力者曰某特附著於斯

求志堂記

安成彭君自堂名其讀書之所曰求志二季幼學尊聞以文來贄而謂予曰先君子作求志堂而有齋志於斯者以未有記也願為我成之予乃記之曰隱居以求其志行義以達其道吾聞其語未見其人先儒釋之曰求其志者守其所達之道達其道者行其所求之志唯伊尹太公足以當之其次則顏子庶乎此而未及有所行故夫子為是嘆也以是言之大哉翁季之名斯堂也夫雖然昔人名斯堂也非不知人之以泰議我也王子塾

問士何事孟子曰士尚志及問所為志則曰仁義而已  
矣伊尹太公顏子之三聖賢亦豈能外仁義以為志乎  
故士志三聖賢識者猶不可謂泰未聞志仁義而議其  
為泰者也予嘗憫夫世之人求在外者求不必得而鮮  
有憚於求者何其多也今賢翁季能求在我者而已又  
何泰堂俯廬江揖孤山偃安成郭前有樓扁清高有亭  
扁會文又有楹臨池曰知樂足領一郡之勝斯則自堂  
所以遺其後人為藏修游息之地者也

世綵堂記

涿江廖氏自其先代積善於家施惠於鄉世保醇德居多耆年至宜山府君子孫衆多第祿豐腆晚歲康健身享榮養歲時上壽綵衣成行才俊疊見里人榮之因取宋名臣廖剛用中甫家世綵舊號為其堂扁余家距涿江數舍雖未獲升世綵之堂而先內翰於宜山公友契兩家子弟往來稔甚有名士元字泰福者廖氏之令器也謁余以斯堂之記余惟世綵之得名自老萊子為嬰



兒之狀以娛其親始余嘗評之老萊子愛親之心純一  
無偽一時感觸發不容遏故忘耄耋之齒服徧爛之衣  
追童乳之態以冀其親萬一之歡在其當時已非不知  
親非不悟二者之天相契深愛其所為善蓋有不期然  
者不然一時嘻笑之適何能使人千載之下想像而稱  
道如是其盛耶在禮子事父母之飾剪髮夾凶親在子  
雖老不敢去之不敢忘赤子之初也深衣之制具大父  
母父母衣純以續然則老萊子之綵容或上古之世有

父母者之常服歟戲之為言將以取轂等事而云耳雖然吾於此有以語廖氏子弟矣孟子曰令聞廣譽施於身不願人之文繡也君家用中甫之為中執法也守正不阿名震遠邇當紹興時其曾大父母年九十竊意高堂垂白之親見其曾孫負一世之名公退委蛇偉然羔羊素絲之風志夫南陔白華之養其為世綵也斯亦大矣古之孝子出而治官入而治家周旋進退於夫婦昆弟朋友宗族鄉黨之間如執玉捧盈惴然自持者無往

而不為事親之地也親之可悅與否非敢計也求無忤  
於已庶無忤於其親矣吾願廖氏世世子孫之升斯堂  
者推是心以為立身顯親之道焉雖中執法之事業可  
能也豈獨踵其美名而已哉國家混一初年宜山公以  
薦受宜山縣簿尉壯歲勇退不仕近年賑饑募民入粟  
補官公發數萬貲爵不受朝省旌表其門又為義廩凡  
宗族親戚及里之貧者婚姻喪塋輒助其不及殮無殯  
者為棺以給之割田數百畝為義舍百區以館從學之

子弟禮聘名士以教之余嘗為之記平居奉已清約遇人謙撝獨好施予如此子膺福號玉峰泰福號納菴伯仲皆肖其父生長華腴而能被服詩書殊無膏粱之習故所友多名士大夫其他子姓之賢者未能悉數云

坦明堂記

古杭山水之秀莫秀於屬邑之臨安蓋錢武穆王之鄉也其民多豪爽而俊邁章君子明居是鄉雞山之陽胸次磊落所向通敏壯遊四方名士大夫樂與之交余近

年因侍講楊廷鎮識其人於京師余老告歸瀏上遠來  
訪余曰昔也冠而字父兄命之曰子明拜而受之自是  
服行平生凡湯漈澠忍之事秋毫不敢匿於厥心以求  
無負於父兄命我以明之意今作堂於其家因扁之曰  
坦明願聞一言以自警余進而告之曰易有之乾以易  
知說易者曰人之所為如乾之易則其心明白而易知  
夫天之為道幽且遠也究其所以然亦惟坦明而已爾  
語曰君子坦蕩蕩君子之異於衆人能存乎天也故其

類為陽小人不能存乎天也所以回互糾結闇昧嶮巇  
人莫得而測之故其類為陰豈獨使人易知哉在已亦  
易行也人已無忤焉往而不坦蕩蕩乎今子明志趨於  
明而心措於坦知先務矣守之以不欺行之以不息他  
日為君子之歸孰能禦之其別授之以辭辭歸而列之  
於坦明之堂以為記

繼善堂記

錙性存者安成人也居鄉以孝弟聞客醴泉十餘年士

君子咸尚其信義頃因其友浙人章子性明來求余繼  
善堂三字既而求予文甚勤予得無言乎夫孟子言性  
善至矣盡矣易大傳言繼之者善也成之者性也詳其  
旨意性未賦予以前善已具於是乎蓋易言一陰一陽  
之謂道具於陰行於陽繼言行也陽之所施凡見諸萬  
物發育之功者無非善也萬物生而是理賦焉受是理  
以生者斯之謂性成言具也道具於陰行於陽知斯二  
者之蘊則造化之能事畢矣是故善即性性即善繼之

者此善成之者亦此善也人能明其善以復其性則抱負二氣以為人可以無愧於兩間矣乎吾聞安成醴泉皆多明經之士而性存儒家子其以斯言講求之

### 精道堂記

吾宗性翁居安成郡北之鳳林實安福府君之五世孫達明處士之裔世次於文忠公擘派為近十有一世府君號精道居士父子祖孫相繼科目一門凡五六贊府嘗即舍傍別作新居以處伯子攸縣丞季子平陽縣



丞自於故居作一書院名曰精道堂與仲子光叔子幹  
居之世代變遷子孫榮悴不齊幹之後有委棄其先業  
者於是堂之基址蕪并豪家鞠為榛莽性翁於是又八  
世孫奮自樹立慨然復之尋得尚書謝公艮齋故題堂  
扁乃除故址作廳事一重樓一重堂一堂之北楣揭精  
道堂故扁既而具始末謁文宗盟以訓後裔余辭不獲  
乃記之曰在易有之日往則月來月往則日來寒往則  
暑來暑往則寒來陰陽屈信以成萬事萬物之變何有

紀極也尺蠖之屈以求信也龍蛇之蟄以存身也精義入神以致用也利用安身以崇德也斯又吾身之所為屈信也堂在居士之身信也久矣屈於中葉性翁信之繼自今居斯堂者亦惟修人事之有恒以制氣化之靡定可也惟能內外交養則精義崇德之為屈屈可進取致用利用之為信信可長守矣嗟夫精之為言察乎理欲之幾順理者無不裕從欲者無不危裕則堂日以興求去夫從欲之危耳為吾精道子孫尚勉之哉堂作於

至元後戊寅之十二月壬子成於己卯之正月辛未遂遷居焉至於庚辰子舍連舉二雄陽類之信自此乎始故特記之

讀書堂記

廬陵永和蕭尚賓為醫十有一世能根柢儒業非但緣飾表襮而已也六世祖子信能屬文善胡忠簡公公予田贈金辭薦以官又辭問所欲則曰富貴非所願但得世世子孫讀書立身以廣活人之功則亦足矣忠簡笑

曰君所謂薄於利而厚於德者乎書讀書堂三大字以遺之使以勗其後人焉至其大父震甫號竹軒又繹其說曰醫道由儒書而出非精於義理者不能舍儒而言醫世俗之醫耳尚賓之父德祥乃拓室之東偏作讀書堂揭忠簡公之扁以志其先訓焉尚賓游京師具顛末謁余為之記夫儒者讀書以正心術為務醫者讀書尤以正心術為急心術正則學術亦正心術偏則學術亦偏正則人受其賜偏則人與己皆為所累矣近世儒家

子孫往往擢科第人以為有陰德行斯陰德自心術始故為蕭氏願之

聽雨堂記

人生俯仰穹壤間耳目之所觸心志之由生士君子仕而慕君則見日而思長安出仕而思親則見雲飛而思親舍索居而思朋友則見明月而思故人兄弟友愛一日而遠別則聽夜雨而思同氣近代眉山蘇長公送弟子由之官有夜雨何時聽蕭瑟之句後世弟昆之在官

遊者往往諷詠而致思焉安成大姓周君士能生以遺腹其兄士弘亦六周星而孤幼同艱貞今也競爽皆以儒弁服綵明時士弘今龍南縣大夫士能今南豐州幕官子叔量又辟為公府掾一門官業鼎盛而南北相望道遠時時追懷少年之況味真有蘇公之所深思者乃作堂於家扁曰聽雨以志翬翬焉先是士弘有樓曰歸雲余嘗記之至是叔量致尊公之辭請記斯堂以文嗟夫君也親也兄弟也朋友也人之於綱常一也日也雲

也月也雨也人之於見聞一也其感於外而動於中有  
淺深焉此士君子之所存異乎常人者也雨注於雷其  
聲鞺鞳滴於階其聲淅瀝馳於竹松其聲屑窅春而聽  
之有發生之意兄弟之和氣怡愉以之秋而聽之有寂  
靜之容兄弟之神凝慮遠以之所以然者豈有外至哉  
予同母兄弟五人今皆黃髮之叟予晚迫召命力疾而  
至京師因叔量之請蓋諗知聽雨之狀而能述以言者  
焉遂以是記

霞外菴記

卷六

宇宙間雲霞雨露同一氣也而有別焉雲陰霞陽雨露生物為陰中之陽霜雪反是以能肅物也今夫朝霞雨微陽亢盛足以變陰陰則雨矣暮霞日微陰盛猶不足以勝陽詰朝其出日乎道家有太霞之號即純陽之異名也是故其珮曰飛霞陽精騰上佩之可步景矣其食曰飡霞陽氣充實食之可却粒矣道士亟取於霞蓋如是與壽昌觀周允中鍊師作菴名曰霞外謁余文記之



因與論陰陽之妙且慨夫田野作勞之人朝夕而候雲霞詎知陰陽之理有如是哉若允中之謂外意其別有超然之識離於二氣之表者斯則方內之士何足以知之

永思菴記

永思菴者安成王君宜遠廬其親之墓而作者也宜遠之先君子是為梅邊先生梅邊初入太學尋丁外艱自以不得與大人永訣終其身不願仕奉太夫人至孝三

十年不懈太夫人亡廬墓者三年孝感昭著宜遠天性  
純篤才氣超邁被先生身教世以孝行聞鄉里先生疾  
晝夜扶持衣不解帶者二年先生歿慟至嘔血幾絕乃  
蘇既塋結草如繭寢處墓左哀至悲泣苦草為腐風雪  
豺虎不避久之母命再三乃歸服闋猶不食醯醬蔬果  
今宰木已拱言及其父哀如初喪每食稍甘必遣人馳  
奉墓所歸乃就食里人表其阡曰白華所居曰永思然  
皆非宜遠意也其友劉君省吾來京師具言永思菴之

所始謁余記之予之在京師也四方之士來謁為其父  
兄求記其樓居齋室者蓋多若永思菴者則友人懼其  
行之無聞於世而記之者也孟子言五十而慕者於舜  
見之曠千百世而見一五十慕親之人至終身之慕猶  
推而知之則孝子之永思不既難乎梅邊於先君渤海  
侯為同舍而又同甲有通家之好感良友之誼記不得  
辭宜遠名畱孫弟初遠名壽孫孚遠名敏孫來遠名州  
孫學行皆能肖其父兄云

臨溪亭記

安成李君鼎翁好賢而篤義里大夫士樂其善而親其賢而鼎翁又能同其物外之樂固自樂之存諸中者沛乎其有餘裕也家居枕溪水上作亭竝溪以醉翁滁亭記語名亭書來暨圖屬予記余少年有山水癖壯乃為祿仕今老矣未能去壯之累而時有少之趣聞客談幽居之勝恨不欣然舍已而從之况見吾鼎翁之圖乎何時與臨溪分坐俯闕清流毛髮可鑒潛鱗游泳不避人

影清風舒徐漪漣回旋悟溪之有文也霜瀨激湍石齒  
玉雪喜溪之能聲也搖琴而歌曰溪之水深且清兮我  
濯我纓溪之水清且深兮我濯我心纓有塵兮尚可心  
有累兮溪將無以澣我外潔靜兮中明娟我與溪兮各  
全其天

歐公為此文時余扈從上都歸則公已謝疾去明年  
十月鼎翁之子本禹求予書歐公年未六十欲分臨  
溪之樂予垂七十而書此可愧矣揭傒斯識

竹西亭記

安成郡南劉君定宇強仕之年蔚有雅操即所居西偏闢圃作亭圃有林竹內翰揭公因名其亭曰竹西定宇又因以為號聞予至其里中遣子仲炯謁予為斯亭記因思昔人之名宮室往往指實而已爾或識其耳目之所接或識其時序之所遇或識其面勢之所居魯之壇曰杏齊之宮曰雪東觀曰東南門曰南比比皆是後世務加美名古意泯矣善哉揭公之名亭亭在竹西據實

而已爾且詩六義興多於比記竹西亭類曰主人清修  
蓋取諸竹主人踈直亦竹是取竹與主人雖或不辭譬  
如燕相得韓相書言舉賢治國治則治矣如本指何衛  
淇澳之詩固美武公其言棗竹不過興爾所謂猗猗青  
青果何預於瑟僖赫喧者乎說詩者不以淇澳棗竹為  
比吾記定宇竹西求詳於竹殆不可也定宇盛年進懷  
用世之志則有幹蠱之子可任以事務退為山林之趣  
則有嘉遯之地可怡其性情斯則作亭之意不可不記

也是為竹西亭記

其樂亭記

宜春士駱秉哲名其燕憇之亭曰其樂吾兄南翁嘗館穀於其家以秉哲之意來求文記之予謂昔之君子於其藏修游息之所有所懲則名有所慕則名惟有所得以名斯志喜也其樂云者孔子以稱顏子者也近代周茂叔教程伯淳兄弟尋仲尼顏子樂處所樂何事聖賢言樂率皆引而不發欲使學者自有所得爾未得而尋



必有其方也已得而居必有其處也樂不可以言喻而  
可以學求處不可以力到而可以學致故非學無以知  
方非得無以知處秉哲從事於斯久矣今以著名其亭  
從可知矣乎予謁告來歸亦思從容名教之樂何時徑  
造其樂之亭從主人問其樂之處也

圭齋文集卷六

欽定四庫全書薈要卷一萬六千四百八十

集部

圭齋文集卷七

元 歐陽玄 撰

序

防里歐陽氏族譜序

歐陽氏之初望出兩郡千乘中絕今存者皆渤海裔也其譜牒視他姓氏宜爲易考又自唐以後譜學久廢我文忠公最先倡之其譜牒視他姓氏宜爲先備今或不能然則以子孫衆多轉徙不常也吾家自趙宋淳熙丁

酉高祖八府君自防里遷瀏之馬渡魯大父宜軒先生  
自馬渡遷長沙大父澹軒先生及先太常渤海伯復居  
于瀏聞八府君在時間歲一至防里由魯大父而下仕  
學四方至者蓋鮮獨幸我族屬不可鄙夷而得叙其世  
次焉頃予在朝防里族兄奇翁先生遣姪勞予京師去  
年謁告南歸又勞予于家且囑叙其譜焉余方約爲譜  
序之行當得備詢而悉載之未幾予環之使至是以不  
果來也因念吾宗之盛儒者又多譜或不一致貽先正

巽齋公之恨然以余今日之事觀之又何恨乎昔人耶  
雖然族譜之作將以重倫紀厚風俗使其子孫知源委  
之所自足矣必求如唐人之譜學自受姓以來皆有可  
考則固有難者矣無已則用吾文忠公之法姑叙防里  
之近者焉則庶乎其可訪求也譜留予所半載迨將北  
行乃叙而歸之奇翁以俟他日云

彭氏族譜序

分宜彭氏其先東漢長平侯宣居淮陽傳九世至北齊

陳留王樂居安定又八世唐禮部侍郎景直居瀛州子  
構雲避天寶之難遷江右傳四世爲安定王玕居廬陵  
玕兄弟五人爲太尉者四子十一人人皆檢校太傅太  
保六曹尚書諸鎮刺史孫二十七人相繼登進士第爲  
顯宦五世孫嗣慶復遷分宜縣南之珠溪今珠溪族甚  
盛或隱于林麓或顯于王門卓犖豪傑世不乏人或明  
經而修進士之業者殆不可量予嘗讀彭氏家傳王雄  
據一方士馬精銳數與淮陽爭衡湖南馬楚爲之請于

後唐錫爵崇貴迹其材智英毅豈下五季諸雄哉惟能  
自處冲抑不竊位號故其子孫衆多美譽不墜此殆鬼  
神之福謙者歟傳又言王享年九十有八繼學不衰子  
弟從授二戴禮及春秋者千餘人非有絕人之資不至  
是也抑彭氏世有聞人爵爲侯王長平侯以文學陳留  
王以武功安定王資兼文武繼自今爲子孫渠璣先訓  
箕裘先業文武以應國家之需則是顯融者豈有既哉  
珠溪之彭吾防里之歐陽族望相同婚姻相繼故叙是

譜不辭

白石周氏族譜序

六朝以來家有譜系之學又有譜系之書隋經籍志載天下郡國族譜若干卷吉州譜八卷洪都袁州稱是江右諸郡詳他郡也唐世此學此書盛行五季淆亂四方割據馬殷在湖南獨能輕徭薄賦又招納賢者故中州名家士多歸之後以希聲兄弟爭國士稍稍散去今觀廬陵周氏族譜言其先世避地江淮丁馬氏亂復徙金



陵蓋唐末自中州依馬氏及亂而遷此亦當時之一族也但譜云江淮當作江湖殷境土未嘗及淮考之馬氏失國既久南唐始亡周氏府君羨仕唐至僕射理宜然也由僕射及今冠蓋不絕屢遷而不替則周氏之德其盛可知矣孫名師韓者有志於譜久備錄而刻之猶子諒以刻本至京眎余求志其帙夫譜學廢譜書亡已久余何幸見古道於周氏然余嘗以杜君卿作通典時譜書具存而杜不紀錄爲可恨今則無所於購矣適承勅

修經世大典偶見周譜因附著予感於斯且志吾廬陵之人尊尚氏族其來甚遠也

後林周氏譜序

廬陵周叔量以其族譜謁余序其端予序南北大姓多矣求其自受姓以來世系不絕歷歷然可考者鮮蓋由世變相承或斷續於南北六朝之離合或散逸於五季列國之紛爭往往而是也唯代有聞人出而振起之及有卓識之士當世變之來善擇地以處則族可至不絕

譜可至不隳也予觀周氏始遷周原迨漢之爵徹侯者  
有其人又降而爲魏博士歷晉至北周爲長安之周甚  
盛涉隋至唐中葉府君璟顯融于時至四世威遭世有  
難避地金陵五世矩事南唐爲御史晚愛廬陵山水之  
秀可居遂依郡公楊竦而家焉即今之西昌宋初有曰  
史館學士有曰光祿僕射皆傑然表於其族淳化而下  
宦業日盛朝廷賜其所居里曰爵譽六世倩又嘉安成  
泉石之勝曰後林而徙居之內附後子孫亦能輯其前

聞由是詩書之澤與爵譽相輝映蓋九世于茲矣叔量  
受知當揆被選爲公府掾會有特旨省臺通用南北士  
遂應令首爲御史臺掾遷臺照磨進中書檢校官因思  
近代名公卿有自以先世或闕於偏方不獲有聲於中  
國及貴徙居中州頗爲士論所少今觀叔量之際遇則  
爲子孫相攸唯當以山水風俗之美若地里之僻左自  
當遇大同之世推一世之公也雖然居者種德以芘其  
後行者畜學以發其身亢宗之道在是而已爾叔量名

浩學行偉然時譽歸之後林周氏之復盛其昉於斯乎  
廬陵中州劉氏族譜序

前代藝文志載郡縣氏族書甚多士君子若唐路氏宋  
呂氏明譜牒之學學者亦不乏人近世氏族書散失士  
於譜學無聞中州故家屢更兵燹仕者投牒天官魯大  
父大父或犯其諱其族譜可知矣江南內附多不煩干  
戈承平既久冠蓋之族幸遭明時涵濡深仁徃徃治其  
家譜不知者以爲一家之私事知者以爲昇平之氣象

可觀於此至正壬午十月余訪族就醫於宜陽道經南  
泉與中州劉君西巖及宗海會于山中出其所修族譜  
眎余徵余序其事廬陵劉氏之顯者獨多於郡中州族  
自廣平來始祖紹聞府君傳至今歷十有七世詩禮相  
仍簪紱相踵試閱其編支分派別昭然在目西巖宗海  
二君之用心可謂勤矣予族宜陽而家劉居間屢欲訪  
族而阻疾聞族有善醫往即之中途見劉氏族譜私竊  
自喜知吾族之必可訪疾已者幾半故因其請而樂叙

其帙端紹聞歸宋積官運使其子有與金陵李氏姻戚者蓋大姓也其詳見王城山先生及宗海自叙云

國朝名臣事略序

應奉翰林文字趙郡蘇伯脩年弱冠即有志著書初爲  
胄子時科目未行館下士甚言詞章講誦既有餘暇日  
筆札又富君獨博取中朝鉅公文集而日錄之凡有元  
臣世卿墓表家傳往往見諸編帙中及夫閒居紀錄師  
友誦說於國初以來文獻有足徵者彙而稗之始疏其

人若干屬以其事中更校讐擲去而導存挾隱而蒐逸  
久而成書命曰國朝名臣事略他日余與伯脩同預史  
屬從借讀之作而嘆曰壯哉元之有國也無競由人乎  
若太師魯國淮安河南楚諸王公之勲伐中書令丞相  
耶律楊史之器業宋商姚張之謀猷保定藁城東平鞏  
昌之方畧二王楊徐之詞章劉李賈趙之政事興元順  
德之有古良相風廉恒山康軍國之有士君子操其他  
臺府忠蓋之臣帷幄文武之士內之樞機外之藩翰班



班可紀也太師少師三太史天人之學陵川容城名節之特異代豈多見哉至於司徒文正公尊主庇民之術所謂九京可作我則隨武子乎乾坤如許大人才當輩出伯脩是編未渠央也姑志余所見如是云

廬陵鄒氏通鑑綱目書法後序

昔司馬文正公變紀傳爲編年作資治通鑑朱文公稍變其法且寓所去取焉是謂綱目讀是書者夫人以爲春秋三傳之遺意也夷考文公生平於易詩書禮或自

傳註或屬門人皆有成書獨春秋缺焉至胡氏傳又逞  
逞信未之確然則綱目何爲而作耶蓋嘗求之春秋者  
魯史舊文說者謂直書其事美惡自見初未嘗拘拘於  
義例者愚蓋不敢必以其言爲非也若司馬公則志存  
鑒戒已見於著書之名而予奪權衡時有所憾文公患  
之故有是作焉初意固有間矣書王宗周天下是時有  
與周同稱號者乎黜魏帝漢有說也乾侯之公在是也  
房陵之帝王乎帝乎故知是書於春秋所以異之跡則

知所以同之旨矣推二大節引而申之書法斷不誣矣  
近時儒者疑爲文公未脫篆之書或疑爲門人之作皆  
未究所以作綱目之志云爾廬陵錡先生研覃於是三  
十餘載比辭而覈研推事以求度綱舉目張如指諸掌  
曰通鑑綱目書法亶其嚴乎余從友人鄂省宰厲馮君  
子羽得而讀之三復歎之曰春秋微公穀啖趙諸說猶  
可綱目微錡氏書誠不可也何時歸青原故鄉願即先  
生一二而揚摧之姑志余說于帙末

忠史序

忠者盡己之名也天以事物當然之理賦於人人盡其所當然者而無憾焉是之謂忠今語人曰臣事君以忠與忠恕之忠同則莫不駭然以爲非而實然也或曰臣盡臣道於君忠矣子盡子道於父何獨曰孝乎曰不然也禮記所謂內盡於己而外順於道忠臣以事其君孝子以事其親其本一也此即吾說也然則上盡其所當然於其下其名曰何曰盡有不敢不勉之義上下之間

必有別也故盡之對爲推即恕矣程子嘗謂忠恕一也  
事上之道莫若忠使下之道莫若恕後儒疑之未喻此  
也人生而靜動與物接即有盡已推已二者出乎其間  
識者知其然固無一息而非吾效忠之時也是道也所  
以事君所以事天詩曰昊天曰明及爾出王昊天曰旦  
及爾游衍亶其嚴乎番易楊玄翁有見於此矣大父通  
守左軒先生當宋季官守以正直聞臨難以死節著玄  
翁慨慕先志作忠史十餘年成書於是上下數千年臣

子大義粲然畢具微而一言一行苟無愧於盡已者悉錄之又微而裔夷小邦婦人女子之操不遺也又極而心跡形似之間皆有以覈其實是非瞭然不繆於古人何其至公而當也嗚呼自忠之說不明士大夫平居無涵養省察之功蒞事無鞠躬盡瘁之志立朝無直言極諫之風至於臨難死節能保其必然也耶嗚呼宇宙間此道明即天地變化草木蕃不明即天地閉塞賢人隱甚可畏也余爲國子博士時職當校獻書既表章之猶

恐玄翁著書之志未白也故述忠說於斯嗚呼是書果行於世也夫書之幸也夫世之幸也夫

虛籟集序

古人之詩被之絃歌其入人之深猶有待於聲今人之詩簡牘而已或一字之工一言之妙真能使人心存而不忘以是徃徃知音於千里之外會心於百世之下求其所以然而莫知孰使然非天乎愚讀秀江縣春洲詩清曠簡遠擬古精到有韋柳風而自名其集曰虛籟嗟

乎瓠者吾知其爲匏簞者吾知其爲管今吾與春洲神  
交冥漠於不識不知之鄉讀其詩愛其人吾不自知吾  
爲何心此蓋南郭子綦之所爲隱几者耶抑又聞達人  
之詩猶治世之音人未達世將治有識者察焉天地間  
有無相推虛實相感聲之妙萬物者其在乎此孫君勉  
乎哉吾有以知君矣題而歸其詩

至正條格序

至元四年戊寅三月二十六日中書省臣言大元通制



爲書續集於延祐之乙卯頒行於至治之癸未距今二十餘年朝廷續降詔條法司續議格例歲月既久簡牘滋繁因草靡常前後衡決有司無所質正徃復稽留奸吏舞文臺臣屢以爲言請擇老成耆舊文學法理之臣重新刪定爲宜上乃勅中書專官典治其事遴選樞府憲臺大宗正翰林集賢等官明章程習典故者遍閱故府所藏新舊條格襍議而圖聽之參酌比較增損去存務當其可書成爲制詔百有五十條格千有七百斷例

千五十有九至正五年冬十一月十有四日右丞相阿

魯圖左丞相博爾克布哈平章政事特穆爾達實恭布巴

勒納琳巴延右丞相吹斯絅叅知政事多爾濟巴勒等入

奏請賜其名曰至正條格上曰可既而群臣復議曰制

詔國之典常尊而閣之禮也昔者周官正月之吉始和

太宰而下各以政教治刑之法懸之象魏挾日而歛之

示不敢褻也條格斷例有司奉行之事也甫刑云明啟

刑書胥占其所從來遠矣我元以忠質治天下寬厚得

民心簡易定國政臨事制宜晉叔向所謂古人議事以制之意斯為得之請以制詔三本一置宣文閣以備聖覽一留中書藏國史院條格斷例申命鈐梓示萬方上是其議於是屬玄叙其首篇玄乃拜手稽首揚言曰人君制法奉天而行臣知事君即知事天敬君敬天敢不敬法書曰天命有德五服五章哉天討有罪五刑五用哉易曰雷電噬嗑先王以明罰勅法又曰雷電皆至豐君子以折獄致刑二卦之象為電為雷所以明天威也

繼自今司平之官執法之士當官蒞政有徵是書毋瀆國憲毋干天常刑期無刑實自此始亦曰懋敬之哉

### 奕序

古者人生入小學比及弱冠而禮樂射御書數六藝之事已徧習矣他日因射之餘意爲投壺且寓禮焉因數之意爲奕且寓智焉其初皆足以養其良心而合乎張弛之道者也投壺之說見禮記奕之說孔孟嘗及之世傳堯以丹朱少智教之以奕雖未必然然奕有算法存

焉足以導智容有是也今小學之教久廢而二事以爲  
伎精之者徃徃名世焉廬陵嚴德甫善奕初集奕法爲  
書晏文可故家子也乃以家藏諸譜又增益之奉禮青  
城楊君以書來爲之求叙將鋟諸梓以廣其傳予性狷  
且拙少賤力學乏暇於琴於奕皆懵然每爲大夫士所  
哂楊君之請愧不能言奕之幽眇以答之姑叙其所知  
者如是

考古臆說序

昔誠齋先生解易取史事以證爻辭安成李廷傑上書  
取史事以言時務皆能極事變而盡物情非特足以垂  
來世之戒推而行之有足以救當時之弊然非學博而  
義明焉能援據如是之精覈論訂如是之詳切耶舉子  
學策套於燈窓求籠罩主司之問立志已在於進取爲  
論何恠於迂踈廷傑此作志在祛時蠹而起民瘼豈切  
切爲功名計耶宜其剴直而無諱明白而可行也間中  
閱此知山林中有識時之俊憂世之士如廷傑者第未

用爾用則於斯民豈無所裨益乎

鈴岡續志序

郡縣之圖志何爲而作也國有賢守令猶家有賢子孫  
守令保圖志以治分地子孫保關券以治分業能治其  
所有即爲賢矣因田野之有定界也而考其有污萊者  
乎因戶口之有定數也而考其有流亡者乎因賦役之  
有定制也考其在公者有湮沒乎在私者有暴橫乎因  
士習之有舊俗也考其有可匡直而振德者乎有可濯

磨而作新者乎治之而無倦則田野可闢戶口可增賦役可均風化可以日美人材可以日盛矣然則圖志可一日而闕乎分宜有縣起宋雍熙至南渡嘉定間謝令謀作縣志尋復不果淳祐黃尉始克成之混一以來更六十有七載浚儀趙侯尚之爲尹百廢具舉乃作鈴岡新志以續前編書成適予叙族至邑南之防里侯以予於是邦實多桑梓之誼以序見屬辭不獲則願以昔人治官如家之責告夫求芻於吾邑者庶知前人作圖志



之意非徒以廣紀載備考訂而已將以爲勤政之一大助也推本作者之意黽勉述者之事吾邑吾民其多幸矣乎

### 風雅類編序

風雅之道先王治天下一要務也風即風以動之之風雅即雅烏之雅以其身能動物也本於邦國播於樂府薦於郊廟以考風俗以觀世道尚矣然惟其聲不必惟其辭故有聲而無辭者有之無聲而有辭者無有也孔

子論韶舞本惟其聲武王所遭遇與舜不同世儒因其  
不同而優劣之未必聖人意也周衰風雅道熄既而聲  
音之學寢廢無已而求言辭之間則後世詩爲近蓋其  
志氣之盛衰意趣之高下音節之淳漓於風俗世道猶  
有可考者是以君子有取也袁君懋昭作風雅類編介  
予宗姪貞爲之求序見其凡例強人意甚多以世代次  
序此得詩譜遺法起四言至樂府止五言七言絕句論  
建精詳去取簡當他日書成於風俗豈小補哉余嘗典

司太常又嘗出爲觀風使者留意茲事而弗克遂偉哉  
袁君是編其爲我趣成之

潛溪後集序

經筵檢討鄭君濤以金華宋濂先生所著文集徵予序  
予爲之言曰三代而下文章唯西京爲盛逮及東都其  
氣寢衰至李唐復盛盛極又衰宋有天下百年始漸復  
于古南渡以還爲士者以從焉無根之學而荒思於科  
試間有稍自振拔者亦多誕幻卑冗不足以名家其衰

又益甚矣我元龍興以渾厚之氣變之而至文生焉中  
統至元之文麗以蔚元貞大德之文暢而腴至大延佑  
之文麗而貞泰定天厯之文贍以雄涵育既久日富月  
繁上而日星之昭晰下而山川之流峙皆歸諸粲然之  
文意將超宋唐而至西京矣宋君雖近出其天分至高  
極天下之書無不盡讀大江以南最號博學者也以其  
所蘊大肆厥辭其氣韻沈雄如淮陰出師百戰百勝志  
不少懾其心思飄逸如列子御風翩然褰舉不沾塵土

其辭調爾雅如殷鼎周彝龍紋漫滅古意獨存其態度  
多變如晴躋終南衆皴前陳應接不暇非才具衆長識  
邁千古安能與於斯雜於古人篇章中蓋甚難辨唯真  
知文者始信予言之弗謬予在翰林也久海內之文無  
不得寓目焉求如宋君何其鮮也苟置之承明奉常之  
署使掌制作豈不能黼黻一代之乎先民有言曰知言聖  
賢之能事立言學問之極功不學知言不能明理不學  
立言不能成文有若宋君其殆理明而文成者歟因書

以為序宋君字景濂濂其名也嘗著人物記二卷余為序之鄭君謂其可擬五代史記亦公論云

易問辨序

易之為書上通神明之蘊下該事物之理以變易為用以會通為方其初立名起義如是其為說宜無窮焉漢以來易專門師多於五經而其疑尤多千有餘年未有紀極族子貞厯考諸家之異同質正先儒之論議初名易疑後改曰問辨凡三十卷用功精深可尚也吾宗巽

齊先生為曾大夫冀郡公作經訓堂記言歐陽氏經學  
司馬氏史學由三代而下代有其人蓋六經甫出孔氏  
之壁歐陽氏即有八世博士世其學其來豈一日哉司  
馬氏史學至宋君實復振歐陽氏經學我六一公易有  
童子問詩有本義凡宋儒以通經學古為高實公倡之  
故余見貞是編喜吾歐陽氏經學疊疊其不絕乎抑是  
編豈獨便場屋之習山林窮經皓首之士見之未必無  
助我之嘆也貞為我勉成之

鈴南道士歐陽賓實詩集序

嘗有客論詩言古今僧之能詩者甚多道之能詩者絕  
少予曰軒轅彌明奈何客曰或以為崆峒道士鄒訢顓  
也予曰嵇叔夜陳子昂李太白為詩識者謂其辭有飄  
飄凌雲之氣蓋道家者流之餘風焉道士學之其為詩  
何以加吾宗歐陽賓實寄興老子法他日以所作詩帙  
遂來求序於余余讀之愛其清綴而有體其間幽閒之  
容冲抑之氣又有因詩而足以知其人者以是知嚮之



論詩之言之未信也雖然余於賓賓猶有甚可喜者焉  
近日龍翔首座海東淖以其能詩深為蜀郡虞先生所  
賞識亦歐陽氏也今實賓詩聲日起豈非吾宗多文人  
秀士寓跡方外猶能以所學知名四方歟東淖白水族賓  
實防里族云

梅邊先生吾汶藁序

論人行事枚舉而稱之者其善為可數論人文章舉一  
以蔽之者其善為不可勝數也廬陵梅邊先生與先君

渤海侯爲太學存心齋同舍咸淳甲戌隨路混補入學  
又同生淳祐之壬子先君嘗稱其才器卓犖有往哲風  
運改世遷篤志稽古蘄爲文章以見志予恨未及一識  
他日從其門人鐫君省吾得吾汶藁讀之至生祭文丞  
相文作而歎曰嗚呼王鼎翁宇宙奇士也士之趣人以  
自裁者惟朱雲於其師蕭望之然望之特一身計耳鼎  
翁之爲言爲天下萬世之爲人臣者計也嗚呼雄哉蓋  
嘗論之斯文者宇宙之元氣也幸而治平措諸事業則

爲典謨爲雅頌不幸而反是則爲春秋爲變風雅爲離  
騷然正人心扶世教之功難見於治平無事之時而屹  
然可仗於流離顛沛之日然後知斯文之所繫如是其  
重歟詩曰德輶如毛民鮮克舉之我儀圖之惟仲山甫  
舉之愛莫助之夫天人維持之際惟是心耳何其深厚  
悠長之味溢出言表耶文武之澤在人其未泯歟鼎翁  
是篇與是詩辭氣雖若不同實相表裏愚故表而出之  
他詩文奇氣壯節類是

環山詩藁序

前年與族弟齊吾同客京華暇日相聚齊吾口誦近作  
予傾聽移日旅懷爲之豁然今年予謁告還家復相遇  
於瀏東之沙江出詩藁示予佳句疊見私竊自喜吾宗  
之多文人也齊吾盛年子長之遊方壯涉歷日遠覩記  
日廣吟詠日富大編巨帙當自此始老兄退處畎畝涼  
竹簟之風曝茅簷之日思草池之句得新集讀之亦足  
以怡暮景矣三復玩味題而歸其帙

圭齋文集卷七